

KALATAS

OPISYAL NA PAHAYAGAN NG REBOLUSYUNARYONG MAMAMAYAN
NG TIMOG KATAGALUGAN

Ispesyal na Isyu

Basahin at Talakayin

Disyembre 26, 2000



Higit na Paigtingin ang Pambansa-Demokratikong Rebolusyon Habang Lahatang-Panig na Nagpapalakas at Nagpapalawak !

Pahayag ng Kalihiman ng Komiteng Rehiyon ng Timog Katagalugan
sa Ika-32 Anibersaryo ng Partido Komunista ng Pilipinas - Marxismo-Leninismo-Maoismo
Disyembre, 26, 2000

Sa Ika-32 Anibersaryo ng muling-tatag na Partido Komunista ng Pilipinas, nagpupugay ang pangrehiyong organisasyon ng Timog Katagalugan sa lahat ng kadre at kasapi ng Partido, mga pulang mandirigma at kumander ng hukbong bayan at rebolusyonaryong mamamayan. Ipinagbubunyi natin ang dakilang araw na ito bilang isang istorikong pananda sa mas determinadong kapasyahan ng lahat ng inaapi at pinagsasamantalang mamamayan na ibagsak ang bulok-sa-kaibuturang malakolonyal at malapyudal na sistemang panlipunang

kinakatawan ng uring malaking burgesya-kumprador at malaking panginoong maylupa. Ating ginugunita ang rebolusyonaryong kabayanihan ng lahat ng martir at bayani ng rebolusyon sa kanilang walang pag-iimbot na dedikasyon at paglilingkod sa pagsulong ng pambansa-demokratikong adhikain ng mamamayan at mga simulain ng sosyalismo at komunismo.

Sa walong taong nakalipas, puspusang itinaguyod natin ang Marxismo-Leninismo-Maoismo at IDKP. Sa proseso, nagkamit ang ating Partido ng malalaking

“Ngayon, ang ating Partido sa rehiyon ay nasa bungad ng malalaking pagsulong sa darating na mga taon.”

pagsulong sa lahat ng panig ng gawain. Di lamang ganap na napigil ang tunguhin ng pagkitid at pagdausdos kundi naibangon ang mga gawaing nagrehistro ng pagbagsak at umabante nang dramatiko at walang kapantay sa nakaraan ang mga rebolusyonaryong gawain sa lahat ng antas at saklaw.

Dahil sa matatag na pagtataguyod sa mga wastong rebolusyonaryong prinsipyo, ang

pangrehiyong organisasyon ng Partido sa Timog Katagalugan ay bumangon mula sa malulubhang pinsala ng “kaliwa” at kanang opurtunismo at ng mapangwasak-sa-sariling isteryang anti-impiltrasyon. Higit pa, nagkamit ito ng malalaking pagsulong na di pa napapantayan sa tanang kasaysayan nito.

Ngayon, ang ating Partido sa rehiyon ay nasa bungad ng malalaking pagsulong sa darating na mga taon. Higit na may kumpanyansa at tatag nating haharapin ang mas mabibigat pang pagsubok at hamon tungo dito. Salamat kay Kasamang Armando Teng, pumanaw na kalihim ng Komiteng Rehiyon ng Timog Katagalugan. Dahil sa kanyang walang-pagod at walang-pingas na paglilingkod sa mga simulain ng Partido at rebolusyon, higit na matatag ang katayuan ng rehiyong Timog Katagalugan na harapin ang malalaking tungkulin sa bungad ng malalaking pagsulong ng Partido at rebolusyon sa rehiyon at sa buong bayan. Ipinamana nya sa atin ang isang pangrehiyong organisasyon ng Partidong konsolidado sa ideolohiya, pulitika at organisasyon at ngayo’y nasa unahan at nagsisilbing inspirasyon sa iba pang pangrehiyong organisasyon ng Partido sa di natitinag na katatagang ibayong isulong ang bagong pambansa-demokratikong rebolusyon sa mas mataas na antas.

Ang mga tagumpay na nakamit ng rehiyong Timog Katagalugan sa loob ng walong taong pagsusulong ng IDKP ay maliwanag na patunay ng katumpakan ng mga rebolusyonaryong prinsipyong muling pinagtibay ng ating Partido at gumagabay sa ating gawaing pampulitika tulad ng mga sumusunod: makauring pagsusuri na malakolonyal at malapyudal ang lipunang Pilipino; ang pangkalahatang pampulitikang linya ng demokratikong

rebolusyong bayan; ang teorya ng matagalang digmang bayan; ang istrategikong linya ng pagkubkob sa kalunsuran mula sa kanayunan; ang pamumuno ng uring manggagawa sa pamamagitan ng Partido at ang nagkakaisang prente na kumikilala sa makauring pamumunong ito at para sa sandatahang pakikibaka.

Matagumpay na nalubos ang IDKP sa rehiyon noong 1997 na isang taong mas maaga kaysa paglulubos sa pambansang antas - isang katangi-tanging marka ng mataas na determinasyon at pagkakabuklod ng buong kasapian ng Partido sa TK sa likod ng IDKP at pagtataguyod sa mga desisyon ng Ika-10 Plenum ng KS. Matagumpay at naging puspusan ang pagtatakwil sa rebisyunismo at opurtunismong inilalako ng mga rebisyunistang taksil at mga anti-Partidong elemento. Ang mahigpit na pagkakaisang nakamit sa buong-pusong pagtataguyod sa IDKP ay tumungo sa matagumpay na pagdaraos ng Ikatlong Panrehiyong Kumprensya ng rehiyon noong Enero, 1997.

Relatibong higit na malalim ang pagkakasapol ng kasapian ng Partido sa mga pundamental na prinsipyo ng Partido at rebolusyong Pilipino. Dahil sa malaganap na pag-aaral sa tatlong antas ng edukasyong pamPartido, relatibong matatas na nakauunawa sa teorya ng Marxismo-Leninismo-Maoismo ang nakararaming kadre at kasapi ng Partido, masigasig silang nag-aaral ng teorya ng MLM at nagsisikap ilapat ito sa kundisyon ng pagrerebolusyon sa kani-kanilang saklaw.

Matagumpay nating nailatag ang mga rekisitos ng malaganap at masinsing pakikidigmang gerilya sa halos lahat ng bahagi ng rehiyon. Sinasaklaw ngayon ng ating pakikidigmang gerilya ang 80% ng mga distritong kongresyunal na pwedeng tayuan ng mga sona at larangang gerilya. Nagtatamasa ito ng malawak at malalim na suportang masa na may humigit-kumulang sa ilampung libong organisado at ilandaang libong naiimpluensyahan. Malayong-malayo na ito sa pinagsimulan nating kulang sa sampung libong organisadong masa nang simulan natin ang IDKP sa rehiyon. Higit sa alinmang panahon, ang baseng masa ng rebolusyon ay mas mataas ang inabot na konsolidasyon sa pulitika ng rebolusyonaryong paglaban.

Naitayo natin ang laking-kumpanyang mga larangang gerilya, mga katamtaman at maliliit na

larangang gerilya sa halos lahat ng mga probinsya at sa signipikanteng tipak ng teritoryo ng rehiyon. Ang mga larangang gerilyang ito ay may malakas na sentro-de-grabidad ng gawaing militar na pinaliligiran ng higit na nakararaming mga yunit na naggagawaing masa batay sa wastong 70-30 balanse ng latag ng mga horisontal at bertikal na mga pwersang gerilya. Tuloy-tuloy na lumaki ang hukbong bayan resulta ng pagwawaksi natin sa sektaryanismo na sumasagka sa ating pagpupunyaging mapangahas na reklutahin ang pinakamaraming bilang ng mga pulang mandirigma ng BHB nang walang pinapapasok kahit isa mang masamang elemento at kasabay nito, nagbabantay sa pailalim na agos at pagpaling sa liberalismo.

Bunga ng reorganisasyon at redispusisyong ginawa natin, mabilis na nalatagan ng armadong yunit ng hukbo ang higit na masaklaw na erya para sa pakikidigmang gerilya at nakamit natin ang mas masinsing mga taktikal na opensiba noong 1997, 1999 at sa kasalukuyang taon. Higit na malalaki at matitindi ang bigwas na naisagawa natin sa reaksyunaryong AFP at PNP lalo makaraan ng 1996 kung saan iwinasto natin ang kalagayang walang tumatayong sentro-ng-lakas pangmilitar ang mga larangang gerilya at sinimulang buuin ang mga platung gerilya sa mga malalaking larangang gerilya at mga iskwad gerilya at panlabang yunit sa mga katamtamang-laki at maliliit na larangang gerilya.

Ang matutunog na taktikal na opensibang nailunsad natin sa mga nakaraang taon lalo noong 1997, 1999 at sa kasalukuyan ay naglagay sa CPP/NPA/NDFP sa pampulitikang entablado bilang isang pwersang belligerent. Dahil sa kalapitan sa sentrong luklukan ng mga reaksyunaryo, hindi kinaya ng reaksyunaryong rehimen na itago ito sa media. Ipinakita rin sa naging wastong paghawak sa usapin sa POW at mga sumunod na negosasyon sa pagpapalaya kina PCI Francisco at Sgt. Melad, at kay SPO4 Magtagad na ang rebolusyonaryong kilusan ay may kontrol sa isang tipak ng teritoryo at umiiral dito ang sariling pulang kapangyarihang pampulitika ng rebolusyonaryong guberno. Nitong huli, ang walang taning na paghawak sa mga POWs na sina PCI Martin at Major Noel Buan, SOLCOM intelligence chief bunga ng pagmamatigas ng rehimeng Estrada at pagsasara sa negosasyon sa pagpapalaya ay higit na nagpapatingkad sa kakayanan

ng CPP/NPA/NDFP na kaya nitong hawakan nang matagalan ang mga POWs bilang paggigiit ng belligerent status nito.

Higit na sumigla ang mga anti-pyudal na pakikibakang masa at hayag na kilusang magsasaka na anti-pasista, anti-imperyalista at nakakawing sa antipyudal na pakikibaka ng masang magbubukid sa kanayunan. Gayundin, sumigla ang rebolusyonaryong kilusang masa sa kalunsuran sa hanay ng mga manggagawa, mala-manggagawa, kabataan, kababaihan, pambansang minorya at iba pang progresibo at demokratikong pwersa. Sumulong at sumigla ang gawaing alyansa at mga kampanyang masa. Mabilis na lumawak ang pag-oorganisa sa hanay ng panggitnang pwersa lalo sa hanay ng mga taong relihiyoso. Tampok din ang naging kontribusyon ng ating rehiyon sa masiglang sumusulong na kampanya para patalsikin si Estrada.

Ang kasapian ng Partido ay higit na nabubuklod sa mahigpit na pagtataguyod at pagsasabuhay ng demokratikong sentralismo, binigwasan ang pinagsisibulan ng burukratismo, at mulat na binabaka ang iba't ibang anyo ng liberalismo, indibidwalismo, lokalismo't sektaryanismo (kabilang ang nakapipinsala nitong anyo ng makitid na departmentalismo) at kabulukan. Patuloy na lumaki ang kasapian ng Partido at nilampasan na nito ang pinakamataas na bilang na inabot sa alinmang panahon sa nakaraan.

Malusog na dumadaloy ang pamumuno ng pangrehiyong sentro ng Partido sa iba't-ibang antas at saklaw ng organisasyon. Ang mga namumunong komite sa iba't-ibang antas at saklaw ay masigasig na gumagampan ng kolektibong pamumuno at mulat na nagiging ehemplo ng simpleng pamumuhay at mahirap na pakikibaka. Matagumpay nating nilabanan at binigo ang pakana ng kaaway na pinsalain ang ating organisasyon mula sa loob at labas - tulad ng pakana nitong magtanim ng ahenteng deep penetration at mga mapanupil na kampanyang kontra-insurhensya tulad ng

"Patuloy na lumaki ang kasapian ng Partido at nilampasan na nito ang pinakamataas na bilang na inabot sa alinmang panahon sa nakaraan."

Lambat Bitag I, II, III, at IV at ang pinakahuling Oplan Makabayan na ngayo'y ginawa nang Oplan Balangai. Sininop natin ang operasyon ng kilusang lihim sa kalunsuran at mariing pinuna't binabaka ang bulagsak na pagkilos.

Sa gitna ng maigting na pakikipaglaban sa mga oportunistang taksil, napagtagumpayan nating muling isaayos ang buong organisasyon ng Partido sa rehiyon. Di lamang napreserba natin ang buong organisasyon ng Partido laban sa mga atake ng reaksyunaryong rehimen at ng kanilang mga ispesyal na ahenteng kontrarebolusyonaryo na kinatawan ng mga oportunistang taksil, sa proseso'y nagtagumpay tayong mapalakas ang pamumuno ng Partido sa iba't ibang antas at saklaw ng organisasyon. Malusog at aktibong gumagampan ng responsibilidad sa pamumuno ang mga namumunong panteritoryong komite mula sa antas ng rehiyon, mga probinsya at larangang gerilya hanggang seksyon at mga itinayong panrehiyong istap.

Solido ang mga nakamit nating tagumpay bunga ng IDKP. Ang lahat ng ito ay magiging malaking puhunan natin para sa ibayo pang pagsulong. May kumpyansa ang ating Komiteng Rehiyon at ang buong organisasyon ng Partido sa saklaw nito na magmamamartsa na taglay ang matibay na rebolusyonaryong optimismong magkamit ng mas malalaki pang pagsulong para iambag ang ganang

atin sa pagkakamit ng ganap na tagumpay ng bagong demokratikong rebolusyon sa unang mga dekada ng kasalukuyang milenyo.

Ang lahat ng ito ay utang natin sa wastong pamumuno ng ating Komite Sentral at sa pumanaw nating kalihim, si Kasamang Armando Teng, na hanggang sa huling sandali ng kanyang buhay ay iginiya niya ang Partido sa rehiyon sa walang katulad na mga pagsulong at tagumpay. Nagpupugay ang buong organisasyon ng Partido sa Timog Katagalugan sa dakilang pamana ni Kasamang Armando Teng at sa sinagisag nyang katapatan at taus-pusong

"Nagpupugay ang buong organisasyon ng Partido sa Timog Katagalugan sa dakilang pamana ni Kasamang Armando Teng at sa sinagisag nyang katapatan at taus-pusong paglilingkod sa Partido at rebolusyon..."

paglilingkod sa Partido at rebolusyon na hanggang sa kanyang kamatayan ay nanatiling walang pingas at dungis. Nagpupugay din ang ating Partido sa lahat ng rebolusyonaryong martir na nag-ambag ng pinakamataas na sakripisyo para maabot natin ang kasalukuyang antas ng pagsulong at mga tagumpay.

Ang mga panlabas na salik ay pumapabor para sa malalaking pagsulong ng ating Partido at rebolusyon sa buong bansa at sa rehiyon. Ang sumasahol na krisis pang-ekonomya at pampulitika ng lipunang malakolonyal at malapyudal ay higit na magpapalagablab ng panlipunang diskontento at magtutulak sa papalaking bilang ng mamamayan sa kanilang milyon sa higit na matatag na rebolusyonaryong aksyon at paglaban. Ang pangkalahatang krisis ng monopolyo kapitalismo at malalang krisis pinansyal na tumama sa malalaki at nangungunang mga kapitalistang bansang industrial ay magpapabilis pa lalo sa krisis ng lipunang Pilipino. Nagbabantang sumabog ang pang-ekonomyang bula ng US sa darating na taon bunga ng matinding krisis pinansyal, depesitong paggasta, labis na pagpapalobo ng halaga ng stocks at imbentaryo, paglikha ng ilusyon ng artipisyal na paglago na di nakabatay sa paglago ng produksyon at pamumuhunan, at di makontrol na daloy ng ispekulatibong kapital sa mga pinansyal na transaksyon. Kapag nangyari, isasadlak nito ang buong kapitalistang mundo sa isang walang katulad na resesyon at depresyon sapul noong dekadang 1930.

Di tulad noong panahon ng maagang paghahari ng pasistang diktadurang Marcos na nakaamot ang diktador ng panandaliang luwag at pagsagip mula sa ayudang petro dollars ng US, si Estrada ay di makakaasa ng panagip na tulong pinansyal mula sa US at mga bagong pamumuhunan mula sa iba pang kapitalistang bansa. Madilim ang hinaharap ng mga reaksyunaryong papet sa Pilipinas at maaliwalas ang landas na hinaharap ng mga rebolusyonaryo at Komunistang Pilipino sa darating na ilang dekada ng kasalukuyang milenyo.

Mabuhay ang Dakilang Alaala at Pamana ni Kasamang Armando Teng!

Mabuhay ang Partido Komunista ng Pilipinas at Bagong Hukbong Bayan!

Kamtin ang Tagumpay ng Bagong Demokratikong Rebolusyon ng Bayan sa Unang mga Dekada ng Kasalukuyang Milenyo! **K**